

# **Uṭup wi Pawulu apiitun banfiyaarun banfētun du utaak wi Filip**

## *Uṭup ujuni*

Ulibra wi uwo kakaarta ki Pawulu apiitun pntuk pi banfiyaarun panwoon du ubeeka wi bajaan badu Filip. Ʀi bayaas bi nul btëbantën, abi Ʀup Uṭup Ulil Unuura du ubeeka mënt kë bañaan badoo fiyaar wa. Natenan Ʀi ulibra wi Ulemp wi Banjañan 16.11-40. Wi babiin awat Pawulu ukalabuş Ʀiki alempar Ajugun, bañaan biki ubeeka wi Filip bajunt itaka awul alon Ʀi baka i bajaan bado Epafrodit añooṭa. Wal mënt wi wi Pawulu apiitun baka kakaarta ki kabeebna baka. Aji na baka bamëban baliint Ʀi pfiyaar, bawut kadek Naşibaṭi kafet, bawut katiink banjaan bajukan bañaan uko umpaṭun na Naşibaṭi. Akak aleşan baka kë bawo Ʀi ploolan na Krittü, kë btiinkar bawoon kawo Ʀi ptoof pi baka.

Hënk di ifah yi ulibra wi iwoon:

1. Pwul mboş na pñehan (1.1-11)
2. Hum di di Pawulu awinarun ubida (1.12-30)
3. Pdo bañaan bado kado ji Krittü (2.1-18)
4. Bañaan banwoon Timote na Epafrodit
5. Ñaan najën awo kalil Naşibaṭi (3.1-4.9)
6. Pawulu abeeb bañaan biki Filip (4.10-20)
7. Pwul mboş pbaañsaani (4.21-23)

### *Pwul mboş*

<sup>1</sup> Nji \*Pawulu na Timote, ηnwoon balempar Yetu \*Krittu, ηwul mboş biki ubeeka wi Filip bti bammëbanuη Yetu Krittu awo biki Naşibaţi na baweek biki baka na banjaan baţenk baweek mënt ţi ulemp. <sup>2</sup> Dñehan Naşibaţi Aşin nja na Yetu Krittu Ajugun bawulan bnuura babot bajoobţenan ηhaaş.

### *Pbeeb na pñehan Naşibaţi*

<sup>3</sup> Dji kabeeb Naşibaţi i njaan kadëman ţi uko winan, nyaaş bti ηi njaan kaleşan. <sup>4</sup> Woli dñehandëran an bti Naşibaţi, dji kawo ţi mnlilan. <sup>5</sup> Dji kawo na mnlilan ţiki du unuur uteek te hënkun, naţu iñeen yi nan ţi ulemp wi pdo kaţup \*Uţup Ulil Unuura na iko bti yi najaan naţenknën. <sup>6</sup> Uko wi nfiyaaruη wii wi : Anjunuη ulemp unuura wi ţi an ado kalempa lemp te uba wa, ţi unuur wi Yetu \*Krittu aklun kabi.

<sup>7</sup> Unuura nwo na uşal utënt waη pa an bti. Na manjoonan dţu'an ţi uhaaş wi naan, woli dwo ukalabuş këme awo ţi pgutar Uţup Ulil Unuura, an bti naji naţenkën ţi ulemp wi Naşibaţi awulun. <sup>8</sup> Aa, Naşibaţi ame kë dmëbanan an bti ţi uhaaş wi naan abot analan jibi Yetu Krittu analan.

<sup>9</sup> Uko wi njaan kañehan Naşibaţi wii wi : Ado unal wi nan udo kadëma dëm pya, te nşal ηi nan ηadoo ηajeeh bnuura nabot nado kayikrën uko bti wi Naşibaţi analuη. <sup>10</sup> Hënk nahilna najoş uko unuur-naaniin naşë nawo bajinţ piş banwoon baanwo na nin buţaan bloη pa unuur wi \*Krittu aklun kabi. <sup>11</sup> Nawo kak bañaan bantumun na uko wi pwo baţool wi Yetu Krittu aţuun ţi an. Hënk nayuuη mndëm mi Naşibaţi, bañaan babot bado kadëmana.

### *Pawulu awo du ukalabuş*

<sup>12</sup> Bayiṭ naan dñal name kë uko undolnuṅ ubaa ṭep ṭep ado kë \*Uṭup Ulil Unuura ukmeetṭana meetṭana pya. <sup>13</sup> Hënk, bangoli bti biki naṣih na-jeenkal na bañaanṅ bti badoo me kë ulemp wi \*Krittü uṭuunṅ kë nwo ukalabuş. <sup>14</sup> Kë uko mënṭ ukak aṭu kë bayiṭ nja batum bahaṭ ṭi Ajugun, akak aṭup Uṭup wi Naṣibaṭi na mntëṅ nin baanji balënk.

<sup>15</sup> Uwo manjoonan kë balonṅ baji baṭup uko wi \*Krittü na uşal wi bpulad na wi bkujar, kë balonṅ başë ji baṭup wa na uşal unuura. <sup>16</sup> Banjaanṅ baṭup uko wi Krittü na uşal unuura, uṅal ujaanṅ uṭu baka pdo hanṅ, ṭiki bame kë ulemp wi naan uwo wi pdo kagutar \*Uṭup Ulil Unuura. <sup>17</sup> Kë bukundi, na uşal wi bpulad wi wi bajaanṅ baṭupna uko wi Krittü. Mënṭ uşal ujintṅ ujaanṅ uṭu baka banaṭa ; baji başal photoalëş mnhaj mi naan du ukalabuş. <sup>18</sup> Kë uko mënṭ uşë wo uunwo nin uko ulonṅ. Uko unkaanṅ udooni uwoonṅ woli na uşal uwuṭaan këme na uşal unuura wa, baṭup uko wi Krittü. Dlılandër uko mënṭ, Dkak ado kalilandër lilandër uko mënṭ pya, <sup>19</sup> dme kë uṭij mbuur mi naan, ṭiki nañehandëraan, kë Uhaaş wi Yetu Krittü ubot aṭënkën. <sup>20</sup> Uko wi nji kayoonkuṅ abot ahaṭ na uhaaş wi naan bti uwo kë nin mënkkowa, dbaa ṭep ṭep hënkunṅ kado jibi njaanṅ kado ṅnuur bti kayuuj na mntëṅ mndëm mi Krittü ṭi uleef naan woli dwo najeb këme woli dkeṭi.

<sup>21</sup> Woli dwo najeb \*Krittü awoonṅ uhëfëntṅ wi naan, kë woli dkeṭi kanuurandën. <sup>22</sup> Kë woli pwo ṭi mboş paṭu ulemp wi naan udo kaya bnũura, mëmme keeri uko udat. <sup>23</sup> Dwo na ṅşal ṅṭëb : dñal pya, kaya kawo na Krittü, wul wi ndoonṅ ahokan

hokan. <sup>24</sup> Kë uşë nuura pa an nwo ți mboş ți. <sup>25</sup> Kë jibi nfiyaaruŋ uko mënţ dme kë dţo ți na an bti, nahilna nado kadëm nabot nawo na mnlilan ți pfiyaar pi nafiyaaruŋ Krittü. <sup>26</sup> Hënk woli dkak du an nahilna kaka uko uloŋ unktuunŋ nataŋar Yetu Krittü kak.

<sup>27</sup> Uko unkaaŋ udooni uwo nado kaţoŋ ubida wi nan, uţaaŋ na \*Uţup Ulil Unuura wi \*Krittü. Hënk, woli dbi du an këme awo mënwo na an katiink kë namëbandër aliint awo ji űaaŋ aloolan agutar na uhaaş uloolan pfiyaar panwoonunŋ du Uţup unuura uhalu. <sup>28</sup> Nakwut nin uyaaş uloolan başooran balënkanaan ; uwo pa baka uko unkyuujunŋ pjot pi baka na unkyuujunŋ kë Naşibaţi abuuranan. Uko mënţ upënna du Naşibaţi. <sup>29</sup> Hënk di uwoonŋ, ți uko wi Krittü : Naşibaţi aţenan kë nahil afiyaara abot aţenan kë nahil phajara. <sup>30</sup> Na manjoonan uko wi nakgutarunŋ uwoonŋ uloolan na wi nawinunŋ kë nji kagutar ; dgutaraara gutar wa jibi nameeŋ.

## 2

### *Btiinkar na pwalan bkw*

<sup>1</sup> Woli pwo baloolan ți Krittü paji patëŋţënan, woli uŋal wi akaaŋ pa an uji uţañanan mŋţëg, woli Uhaaş wi Naşibaţi uţu'an kë nakak baloolan, woli naŋaladi abot aűagiir, <sup>2</sup> natiinkaran keeri, naŋalad, nala pwo ți ploolan ți uhaaş na ți uşal. Hënk dlunŋ kalilan maakan. <sup>3</sup> Nawutan kado kado nin uko uloŋ na uşal wi bpulad, këme kado kado uko uloŋ kalaana pwinana. Naţëpën ţëp nawalan ikow nado katen batëŋţan ji badëm apelan. <sup>4</sup> Andoli awutan kaşal uleeful ţañ, adoon kaşal batëŋţul.

<sup>5</sup> Nawoon na uşal utëŋţ wi Yetu \*Krittü ți ptoofan

- 6 Ul anwoon ji Naşibaţi  
aşë wo aanţo aten plinj pi alinjun na Naşibaţi
- 7 abaa ţëp ţëp apok pdiiman mndëm mi nul  
akak awo ji bañaan bti,  
akakan uleeful nalempar bañaan.  
Kë bañaan bti bawin kë awo ñaan najën.
- 8 Awalan bkowul adoo wo  
aampok pok pdo nin uko ulon wi Naşibaţi  
añalun,  
adinan pkeţ, adoo dinan pkeţ ti krut.
- 9 Ukaan kë Naşibaţi adeenja du bko duuţ,  
awula katim kandëmun apel itim bti.
- 10 Hënk, banktiinkun bti katim ki Yetu  
du baţi na mboş, na du mnkeţ banjup.
- 11 Itum bti ibot ido kadëman Naşibaţi Aşin nja  
kaji Yetu awoon Ajugun.

### *Ulemp wi baţaşar Yetu*

12 An bayiţ naan biki mmaganun, dme kë naam-  
baan kaţañanaara pdo kaţaş Naşibaţi. Nawutan  
kado kaţaşa keeri woli dwo na an ţañ, nadoon  
kaţaşa kak maakan woli mënwo na an. Nadoon  
kalempar mbuur mi nan ti pdo kawalan ikowan  
na ti pdo kaţaş Naşibaţi na palënk. 13 Naşibaţi ul  
ajaan aţu'an, kë naji nañal pdo kabot kado uko wi  
añalun.

14 Woli nawo i pdo uko ulon nawutan kado  
kañur njuran, këme kado kalaţar. 15 Hënk nahil  
kawo bañaan bajinj piş biki bawoon baankwin  
nin uko ulon wi pţup ti baka, babuk Naşibaţi  
banwoon baanwo na nin buţaan blon ti ptoof pi  
bañaan biki umundu wi banwoon baţilan na bado  
buţaan. Nado kanuur wal mëntţ ti umundu, 16 an

namëbanuŋ Uŋup unjaan uwul ubida. Hënk, dlunŋ katanaran ŋi unuur wi \*Krittü akluŋ kabi, ŋiki pŋi pi naan na unoor wi naan ŋaankwaan udooni. <sup>17</sup> Woli pñaak pi naan padoo wo i ptula kawo uñaakan wi bŋeŋan banwoonŋ pfiyaar pi nafiyaaruŋ, kalilanaara lilan kabot katanŋ na an bti. <sup>18</sup> Hënk kak nawo i kalilan kabot katanŋ na nji.

### *Kayili ki bi Timote na Epafrodit*

<sup>19</sup> Dhaŋ ŋi Ajugun Yetu aji dyil ŋi ŋnuur ŋi Timote du an, ahilna ajoobŋenën udeeb nji kak, woli dŋiink jibi nawoori. <sup>20</sup> Mënka nin ñaanŋ alonŋ kak anjaanŋ aŋu uŋal ŋi an ji nji kala pme jibi nawoori na manjoonan. <sup>21</sup> Bukal bti ikow yi baka yi yi bajaanŋ balempar, baanji balempar Yetu \*Krittü. <sup>22</sup> Kë ul, nawin an bti uko wi ahiluŋ pdo. Awo na nji alemp jibi napoŋ ajaanŋ awo na aŋin, kë ŋklemp un batëb bti aŋup \*Uŋup Ulil Unuura. <sup>23</sup> Ul i i nji nŋaluŋ pyil du an keeri, wi nji kamehanŋ me jibi uko wi nan ukluŋ kaŋëp. <sup>24</sup> Nji kak dhaŋ ŋi Ajugun aji dbi kak du an hënkunŋ uunkjon.

<sup>25</sup> Kë nŋë ten awin kë dwo i kayil Epafrodit kak, ayiŋ nja ŋi \*Krittü, i ŋjaanŋ ŋgakandër kalemp kabot kagutar \*Uŋup Ulil Unuura. An nayiluluŋ ŋi nji ado kalemparaan wi nwoonŋ ŋi kanuma. <sup>26</sup> Abi ŋal maakan pwinan an bti abot ahaajala, wi natiinkunŋ kë amaaki. <sup>27</sup> Na manjoonan abi maak adoo ñogan pkeŋ, kë Naŋibaŋi aŋë ñagi'a. Mënŋ ul ŋaŋi i añaŋiinŋ, nji kak añaŋi'aan maakan, ado hanŋ nwutna woli dpën ŋi mnŋëg mi, kaneej ŋi mlonŋ. <sup>28</sup> Dkeer ataran kayila du an nahilna woli nawina nalilan, nji mbot nwo mënka ajootan maakan. <sup>29</sup> Nayeenkana na mnlilan ji ñaanŋ anwoonŋ i Ajugun, nabot namëban

bañaan banwoon ji a bnuura. <sup>30</sup> Ul ankakuñ i pkeṭ pa ulemp wi Krittü, ayeenkaran ado ulemp wi nawoon naanhil pdo an ṭi nleefan pa nji adoo kak i pkeṭ.

### 3

#### *Bnuura bi pme Yetu Krittü*

<sup>1</sup> Kë hënkun an bayiṭ naan, nalilaan ṭi Ajugun. Nin uunwo unoor ṭi nji nkak mpiitan uko wi ndoon abi piitan, uko mënṭ utëṅṅënan tënṭan. <sup>2</sup> Nalipariin bañaan banwoon ji nbuṣ\*, bado buṭaan, bukal biki pwala katëmp pawoon ṭaṅ pfal uleef. <sup>3</sup> Nja njaan nṭëpna ṭi Uhaaṣ wi Naṣibaṭi kadëmana, nja nṅṅuun mindëm mi nja ṭi Yetu \*Krittü, abot awo nënhaṭ nleef ni nja, nja nwoon banwaliin katëmp na manjoonan.

<sup>4</sup> Kë nji, ddoon aka uko unhilanun kaṭu'ën nhaṭ uleef naan. Woli alon anun kë ahil phaṭ uleef, nji dhilun kahaṭ uleef naan kapela. <sup>5</sup> Nji i bawalanun katëmp wi mbukiin ado nnuur bakreñ, dwo i pntaali pi \*Itrayel, i pṣini pi \*Benyamin, dwo na heberë abuk naheberë. Ṭi uko wi pṭaṣ \*bgah dwo \*nafaritay. <sup>6</sup> Dbi wo ñaan anṅaluñ uko wi Naṣibaṭi maakan adoo nuñ wi nji kahajanun banfiyaarun Yetu kë ddo do wa. Woli pṭaṣ uko bṭi wi bgah bajakuñ aji uwo uṭool, nin ñaan alon aanhil kajakën uko ulon.

<sup>7</sup> Kë iko bṭi yi mbiin aṣal kë iṭu'ën nwinana bnuura ṭi kadun ki Naṣibaṭi, Krittü ado kë mme kë dbi neem na manjoonan. <sup>8</sup> Aa manjoonan ma, ntenle bnuura bweek maakan banwoon ṭi pme

---

\* **3:2** Nbuṣ: Bayuday baji baji banwoon baanwo bayuday bawo nbuṣ.

Yetu \*Krittü Ajugun dji kawin kë dbi neem ti iko bti. Atu kë nwaan iko bti yi mbiin aka, kë nşë win kë iko bti iwo iwetar yi nwoon i kafel du pyewel kahilna kaka Krittü. <sup>9</sup> Kë ti a di nwoonun natool ti kadun ki Naşibați, pwo natool pi ptaş bgah pawoon paanhil pwulën. Woli dfiyaar Yetu tañ di nhilun kawinana pwo natool ti keş ki Naşibați. <sup>10</sup> Uko wi njalun uwo pme Krittü. Pme'a pawoon pme mnhina mi pnața pi nul ti pkeț na phaj ji a kaşë kanaam na a ti pkeț pi nul. <sup>11</sup> Kë hënk, dhaț kë Naşibați alun kanațanaan ti pkeț.

*Pten kadun, kagutan pwo natool na manjoonan*

<sup>12</sup> Mënji ddo bi ka ka uko mënț këme nwo ñaan anwoon aanwo na nin buțaan dlon, kë nşë taman katen me dmob uko mënț, tiki Krittü amobnun nji ti uleef naan. <sup>13</sup> An bayiț naan, dme kë mendo bi mob wa. Kë uko uloolan tañ wi wi nwoonaanun ti uşal, uko mënț wii wi : ptilma iko bti yi ndoon abi do, kado katen kadun, <sup>14</sup> kagutandër uko mënț kahil kayeenk uko wi Naşibați aduurnun du bați duuț ațepna ti Yetu Krittü.

<sup>15</sup> Nja bti njijun ti pfiyaar Yetu, najoh keeri ntu uşal ti uko mënț. Woli nawo na nşal ntëb ti uko ulon Naşibați kajințanan wa. <sup>16</sup> Kë ti dko di nbanun hënkun, najoh njwut kațañan ptaş bgah bi njejun.

<sup>17</sup> Bayiț naan, an bti nadoon katen ti nji, nabot nado katen ti bañaan banjaan bataş uko wi njakanan. <sup>18</sup> Batum baji bado ji başoor krut ki \*Krittü jibi ndoon abi țupan akak ațupan hënkun na mnkuul ti keş. <sup>19</sup> Babaañşaan du bdoo. Mënț Naşibați i i bafiyaarun, iyin yi baka yi yi bafiyaarun. Baji bațanar uko unwoon kawo lah



mnkow pa baka, bukal banjuun ɲhaaş ɲi baka bti ɲi iko yi mboş. <sup>20</sup> Kë nja, ɲwo biki baɲi, dul di ɲkyoonknun nabuuran i nja Yetu Krittü Ajugun. <sup>21</sup> Ul aktëlëşun ɲleef ɲi nja ɲanjaan ɲaket, kakakan ɲa ɲanaam na wi nul, unwoon uleef unwoon na mndëm. Aɲëlëş ɲa na mnhina mi ajaan aşıhna iko bti.

## 4

<sup>1</sup> Hënk an bayit naan biki mmaganun maakan, dnuhan maakan, an nawoon mnlilan mi naan, na uko unkyuujun kë nji dwatun ɲi kampëtar ki nji kapëtarun. An biki mmaganun, hënk di nawoon kamëban kaliint ɲi ptaş Ajugun.

### *Uko wi pdo*

<sup>2</sup> An bi Ewodi na Funtic dkooŋan kooŋ naten ɲi Ajugun nakak natiinkar. <sup>3</sup> Kë iwi injaan klemp ulemp wi njaan kalemp\* na manjoonan, ɲënkän baaŋ batëb bukuŋ ɲi uko mënt. Babi wo na nji agutar \*Utuŋ Ulil Unuura, na Klement na banjaan balemp na nji bti, biki itim ipiitaniin ɲi \*Ulibra wi Ubida.

<sup>4</sup> Nalilaan ɲnuur bti ɲi Ajugun ɲi uko bti. Aa, dkak akakalëş, nalilaan. <sup>5</sup> Pjoob bkow pi nan paw-inaniin ɲi baŋaan bti. Ajugun aanlowi. <sup>6</sup> Nawutan kaŋaaf nin uko ulon. ɲi iko bti, nakooŋan Naşibaŋi nañehana uko wi nanumiin. Nabeebana woli nañehana uko ulon. <sup>7</sup> Hënk, ajoobtënan ɲhaaş udoo upel iko bti yi uşal uhilanun kaşal abot amëban itëb yi nan na ɲşal ɲi nan ɲi Yetu \*Krittü. <sup>8</sup> Bayit

\* **4:3** Injaan klemp ulemp wi njaan kalemp : ɲi utuŋ ugrek bapiit aji « Tuŋuŋot », uhinan kawo katim ki ñaan. ɲi, balon baji katim ki ñaan ka.

naan, uko wi nji kabaañsaanuŋ wi : naŋuun nŋsal ƚi uko bti unwoonŋ manjoonan, uko uwoonŋ uunji uŋu ñaanŋ mnkow, unwoonŋ uŋool, unwoonŋ ujinŋ piŋ awo uunwo na nin buŋaan bloŋ, unjaanŋ uŋu ñaanŋ kaŋalana, uko unyukuŋ ptiink, uko unuuriinŋ maakan, uko unwoonŋ wi pmëban na iñeen itëb. <sup>9</sup>Uko wi najukuŋ ƚi nji, wi nayeenukuŋ abot atiink ƚi nji, wi nawinnuŋ kë nji kado, iko mënŋ bti nadoonŋ kado ya. Hënk, Naŋibaŋi anjaanŋ ajoobŋtën nŋhaaŋ awo na an.

*Pbeeb Naŋibaŋi ƚi uko wi ajaanŋ aŋen*

<sup>10</sup> Dlilan maakan ƚi Ajugun, wi nakaanŋ ayuuŋ kë naŋu nŋsal nji nan ƚi nji. Mënji naambaanŋ kaŋu'aara nŋsal ƚi nji, naambi hil hil pyuuŋjën uko mënŋ. <sup>11</sup>Mënŋ kanuma kaŋu'ënuŋ kë nji kaŋiini hënk, djuk plinŋ ƚi uko wi nkaanŋ. <sup>12</sup> Dhil pwo ƚi bwaanŋ abot ahil pwo ƚi pyok. Dko bti di nwoonŋ na ƚi iko bti, Naŋibaŋi ado kë nhil kayok këme kawo na ubon, kë nhil pwo woli dka maakan këme awo ƚi kanuma. <sup>13</sup> Anjaanŋ awulën mnhina adoluŋ kë nhilan pmiir iko bti. <sup>14</sup> Kë an naŋë do bnuura wi naŋtëknunŋ ƚi unoor wi naan.

<sup>15</sup> An biki ubeeka wi Filip name bnuura, wi njunuŋ pŋup \*Uŋup Ulil Unuura apënnna uŋaak wi nan wi Matedoniya, nin pntuk ploŋ pi banfiyaaruŋ Yetu paanŋtënkën na itaka, yi nan ŋaŋ yi yi nji nyeenukuŋ. <sup>16</sup> Wi nwoonŋ du ubeeka wi Tetalonika, mënŋ uyaaŋ uloolan ŋaŋ wi wi nayilbanaanuŋ uko wi nnumiinŋ. <sup>17</sup> Mënkla la nawulën uko ulonŋ, uko wi nŋaluŋ uwo : uko wi nadolunŋ uwo bnuura bi Naŋibaŋi akhoŋalëŋuŋ ƚi iko yi ahankananaŋ. <sup>18</sup> Dyeenk iko yi nnumiinŋ bti, ido pel kanuma ki naan. Dtumandëni, hënkunŋ

wi nyeenkun iko bti yi nayilun Epafrodit atijen. Iwo ji ptekeñ plil pi btejan bi Naşibaţi adiın abot alilandër. <sup>19</sup> Kë Naşibaţi i njaan kadëman aşe hank ti Yetu \*Krittu bnuura bweek maakan, alun kaşepna ti ba kawulan uko bti wi nanumiin. <sup>20</sup> Mndëm mweek manwo ti Naşibaţi Aşin nja te mnşo! Uwo han.

*Pwul mboş pbaañşani*

<sup>21</sup> Nawulan mboş bañaan bti bammëbanun Yetu \*Krittu awo biki Naşibaţi. Bayiş nja banwoon ti na nji bawulan mboş. <sup>22</sup> Banwoon biki Naşibaţi bti awo ti na nji bawulan mboş ; banklemparun \*Fetar naşih najeenkal ti baka bawulan mboş maakan.

<sup>23</sup> Ajugun Yetu \*Krittu awulan bnuura bi nul an bti.

**Ulibra wi Naşibaṭi**  
**New Testament and Shorter Old Testament in**  
**Mankanya**

copyright © 2014 Wycliffe Bible Translators, Inc.

Language: Mankanya

Translation by: Wycliffe Bible Translators

Contributor: Wycliffe Bible Translators, Inc.

**Copyright Information**

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mankanya

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2015-03-17

---

PDF generated using Haiola and XeLaTeX on 21 Feb 2024 from source files  
dated 30 Dec 2021

a40dd8c3-0687-5ed7-bd1a-ef16ae8e3b9c